

886-التدريب عن بعد :الإشراف على العلاج النفسى (77)

صعوبات الواقع، وحدود المسئولية، والذنب!

أ. مراد عبد الحفيظ: هى عيانة عندها 35 سنة متجوزه بقالها شهر ونص حضرتك كنت محولهاى من حوالى 3 سنين ونص أو 4 سنين

د. محيي: بصراحة كتر خيرك، قدرت تخليها تستمر المدة دى، بتدفع كام بقى؟

أ. مراد عبد الحفيظ: حاجة بسيطة، دى كانت من الحالات الأولانية خالص

د. محيي: آه صحيح، آه! دا انت بقالك ثلاث اربع سنين معاها، يعنى قبل الغلا

أ. مراد عبد الحفيظ: هى كانت معاها دبلوم تجاره وبعين هى منطوية (شيزيدية) بمعنى الكلمه، يعنى كان عندها صعوبة فظيعة فى التواصل معايا فى أى اتجاه، كلام أو عنين أو أى حاجة

د. محيي: برافو عليك إنك تقدر تستمر المدة دى وتحافظ على العلاقة، انت بتقول إنها متجوزه بقالها شهر ونص بس؟ مش كده؟

أ. مراد عبد الحفيظ: أيوه، شهر ونص

د. محيي: يعنى قعدت معاك 4 سنين لحد ما فكت وعملتها، يعنى البركة فيك برضه، إنت اللى جوزتها

أ. مراد عبد الحفيظ: هى ما قعدتش 4 سنين منتظمين قوى كده يعنى

د. محيي: ماشى ماشى

أ. مراد عبد الحفيظ: هى كانت واخده دبلوم تجاره، وبعدين دخلت كلية فى الجامعة المفتوحة وخلصتها الحمد لله، وبعدين قطعت مدة، وبعدين جُم لى قبل الجواز هى وأمها وكده، واتكلموا معايا، وياترى تتجوز ولا ما ينفعشى، أنا طبعا

شجعت جامد على الجواز، المهم إن هي أتجوزت، بصيت لقيت المشكلة ظهرت بشكل تاني بعد الجواز، أصلها أتجوزت واحد أصعب، فبقت العلاقة بينهم صعبة لدرجه إن هما الأثنين مايبصوش لبعض، يعنى تديله كوباية شاي وهى وشها فى حته، وهو وشه فى حته

د. يحيى: اسم الله، علاقة ناجحة ميه فى الميه

أ. مراد عبد الحفيظ: العلاقة الجنسية فاشله بينهم مافيش خالص

د. يحيى: لأه وضح، يعنى إيه مافيش خالص

أ. مراد عبد الحفيظ: يعنى هو حاول، وفشل، وبطل

د. يحيى: يعنى ماجحشى ولا جزئيا

أ. مراد عبد الحفيظ: لأه هو حاول مرتين، هى بتقول لى أنا ما أصرتش، وهو ماحاولشى تانى

د. يحيى: يعنى هى لسه بنت بنوت

أ. مراد عبد الحفيظ: آه لحد دلوقتى، أصل الجواز كان فيه زى صفقه من الأهل تقريبا، يعنى هما اللى جابو العفش وكل حاجة، والولد شكله غلبان، يعنى، فالجواز تم بهذا الشكل يعنى

د. يحيى: جوزها عنده كام سنة

أ. مراد عبد الحفيظ: عنده 33 سنة

د. يحيى: أصغر منها بسنتين، بيشتغل إيه؟

أ. مراد عبد الحفيظ: شغال فى محلات كده زى كاشير معاه بكالوريوس

د. يحيى: وهى ؟

أ. مراد عبد الحفيظ: هى معاه ليسانس جامعة مفتوحة زى ما قلت لخضرتك، بعد دبلوم تجارة

د. يحيى: بتشتغل ؟

أ. مراد عبد الحفيظ: إشتغلت شهر بالطب، والشغل هو اللى جوزها، يعنى شهر كده فى معمل تحاليل، وأثناء المعمل حد شافها طيبة وغلبانه فقال تنفع فلان، فتمت الجوازه بهذا الشكل

د. يحيى: السؤال بقى إيه؟

أ. مراد عبد الحفيظ: هى دلوقتى بتلومنى إنى أنا شجعتها على الجواز، هى مش ميسوطة طبعاً، ونسبة الفشل المنتظر يفركش كل حاجة عالية جداً، يعنى احتمال الطلاق ممكن يحصل فى أى وقت، ثم إنى حاسس إن استمرار شغلى مع الست دى، زى ما يكون مخليها معذبة جوزها فى الحركة والوعى

د. يحيى: وانت إيش عرفك حركته شكلها إيه؟

أ. مراد عبد الحفيظ: عرفت منها، هي بنت طيبة وصادقة، يعني مش ظالمه ولا حاجة، ده حكى عليها، لأه نتيجته الأربع سنين فى العلاقة، وقدرت أفهم منها إن هو حالته أصعب منها، يعني هو محتاج علاج أكثر

د. يحيى: هوا انت شفته؟

أ. مراد عبد الحفيظ: لأه، هي اللي بتقول

د. يحيى: ما يمكن هي مش عارفة إيه اللي بيحصل بالطبيب

أ. مراد عبد الحفيظ: . تقريبا كده فعلا

د. يحيى: مش برضه لازم تعرف يا بنى أكثر، وبالتفصيل

أ. مراد عبد الحفيظ: ما أنا باحاول معاه، وهى صعبه لسه برضه

د. يحيى: مش تشوف الطرف التانى يا أخی

أ. مراد عبد الحفيظ: أنا قلت لأمها إنه هو ممكن يكون محتاج علاج هو كمان وفكرت إن إحنا نعرضه على حضرتك زى ما بتقول لنا، بس هوه جوزها شكله إنه رافض خالص فكره العلاج، وقال أنه ما فيش أى مشكله، وراح طارح الطلاق على إنه الخل، وهما لسه مابقالهمشى شهر ونص.

د. يحيى: كل ده وانت ما قابلتوش من أصله

أ. مراد عبد الحفيظ: هو رفض المبدأ، هو مجرد ما أنا قلت لهم نحش للدكتور يحيى عشان يبقى الكلام من خلال حضرتك يعنى، فأول ما عرضوا عليه فكره العلاج، ومش العلاج رفض

د. يحيى: السؤال بقى تانى؟

أ. مراد عبد الحفيظ: أنا أعمل إيه فيه، ولأ فيها دلوقتى؟

د. يحيى: بصراحة : ما يقدر على القدرة الى الله

أ. مراد عبد الحفيظ: الدنيا صعبة، ومش عارف بقت كل ما بتجيبلى باحس بالعجز والفشل بصحيح

د. يحيى: أنا قلتلكوا قبل كده إن الدكتورة "م....م"، الريسة بتاعتنا، شاطره فى الحالات دى، ما اعرفش شاطرة ازاي، بس هي شاطره شاطره، وانا حولت لها حالات كتيرة، بعد مدة طويلة من الفشل، مش شهر ونص، ونجحت نجاح أنا استغربت له، يعنى هي عارفة المفايح الظاهر وحاجات كده، فممكن تسألها حتى لو ماجاش الزوج، يمكن تقول لك تعمل إيه، ولو جه الزوج ممكن تساعدهم معاك أو لوحدها، ده لو قرروا يكملوا من أصله.

أ. مراد عبد الحفيظ: ما هو مش حايجي، ما انا قلت لخضرتك إنه رافض نهائي.

د. يحيى: بصراحة برغم إنك قعدت أكثر من ثلاث سنين، وإنها خدت الليسانس على إيدك، وبرضه اتجوزت بتشجيعك، إنما المعلومات ناقصة بشكل فظيع، يعنى البننت متأخرة فى الجواز من أصله، وبعدين جواز بالشكل ده يتم بالصدفة تقريبا، وقوام قوام، وفيه شبهة رشوة وهما اللي جهزوا كل حاجة، وكلام من ده، كل ده معناه إن البننا كله مبني هش على غير أساس. وانت دلوقتي عمال تتكلم على إنها تعديه ولا ما تعديهوش، تعدى مين يا راجل، هوا احنا عارفين هوه واقف فين، ولا هى عدت بصحيح ولا تلصيمة، وتقول لى تعديه ولا ما تعديهوش، تعدى إيه دلوقتي؟ إحنا فى إيه ولا فى إيه واحنا مش عارفين هما حايكملوا ان شالله سنة ولا ست شهور كمان ولا لأه.

أ. مراد عبد الحفيظ: أنا بصراحة حاسس بمسئولية، ويمكن شوية ذنب من إني شجعتهما، والجواز تم قوام قوام.

د. يحيى: مسئولية آه، إنما ذنب لأ، إوعى حكاية الذنب تخش فى العلاج، إنت عارف علاقتي بالذنب والكلام ده، فى العلاج وغير العلاج، وأنا اتكلمت فى الحكاية دى مرات كتيرة قوى، إنت تتوَجح، تتألم، تصحج، تستشير، إنما ذنب لأه، إنت عملت اللي عليك، واحنا هنا عمال على بطل عمالين نقول يا جماعة الطبيب والد، واحنا ثقافة خاصة، والبننت لازم تتستر، وكلام من ده، صحيح كل ده صح، بس مش قوى كده، هوّه ده مبدأ كويس إنت الظاهر اقتنعت بيه، بس باين عليك زودتها حبتين من عنك، إنت فعلا لو دى بنتك أو أختك يمكن كنت حاتعمل نفس الحكاية حتى لو غلط، تبقى مش ذنب، وفيها إيه لما دخلت الخيرة، وفشلت، هى حاتزيد انطوائية وشيزيدية يعنى؟ ماأظنش، إنت لسه قايل إنها بتتحرك، وخايف إنها تعدى جوزها، خالى بالك الكلام ده إنت مش قايله بالصدفة، فى الغالب فيه حاجات إيجابية حصلت خلال المدة دى كلها، خدت الليسانس بعد الدبلوم، واشتغلت، ودخلت مخاطرة العلاقة، تيجى بقى تفشل ولا ما تفشلشى فى شهر ونص، لأه المدة دى مش كفاية خالص، باقول لك أنا ساعات بتجيبلى حالات بعد سنين، وباحولهم للدكتورة "م...."، وبعدوا، مش انت قلت إن عندها 35 سنة، حاستنى إيه أكثر من كده، لكن برضه تتعلم بالنسبة للحالات الجاية إن الوقت مهم جدا، والإعداد مهم زى ما العمر مهم.

أ. مراد عبد الحفيظ: يعنى أعمل إيه دلوقتي؟

د. يحيى: وماتنساك كمان إن فرص المطلقات فى مجتمعنا أعلى من فرص العوانس، مش عارف ليه، صحيح دى لو اتطلقت حاتطلق بعد شهر ونص، ودى فى مجتمعنا للأسف بتبقى فى وش البننت أكثر من الراجل، منتهى الظلم طبعاً، إنما أهو دا اللي حاصل، لكن برضه حاتلاقى فرصها مش أقل من فرص المتأخرات فى الزواج، يمكن أحسن، يعنى واحده عندها 35 سنة ومطلقه، غير واحدة فى نفس السن وماجتوزتش، بس طبعاً مطلقه بعد شهر ونص فيها كلام تانى

النهاية بدرى، وهو حر، ما نقدرش نحس عليه ولا نتحايل ولا نلضم، بس انت كل اللي عليك انك تآدى واجبك طول ما فيه فرصة، ما نقدرش تهدر شغل أربع سنين وفيه بوادر نضح انت شاورت عليها، علشان خاطر واحد مادخلشى التجربة من أصله، ومش عارف يمك منها كباية وجها لوجه، ويص لك الناحية الثانية، لا يا عم، يفتح الله، ده إذا كان كلامها صح، على فكرة : هى حلوة ؟

أ. مراد عبد الحفيظ: هى متوسطه يعنى، أو اكر شوية

د. يحيى: جذابة؟

أ. مراد عبد الحفيظ: مش قوى

د. يحيى: إنت عارف طبعاً إن الجاذبية أهم من الخلاوة

أ. مراد عبد الحفيظ: بالنسبة للرجال مش جذابه

د. يحيى: بالنسبه للرجال؟؟ إمال انت تبقى إيه؟

أ. مراد عبد الحفيظ: أنا معالج، يعنى بالنسبة ليًا مش جذابة، لأه

د. يحيى: إنت عارف إحنا بنكرر المثل الطريف بتاع، "يا وحشة كون نغشة"، مش كده؟ بس لازم الست دى فيها حاجة هى اللي خلتك تستمر معاها أربع سنين يا أخی، أصل ممكن الجاذبية تبقى هادية ومن تحت لتحت، إنت عملت اللي عليك، وحاتم عمل اللي عليك، ولازم البنت تستاهل، ربنا يوفقك.

أ. مراد عبد الحفيظ: طيب شكراً.